

MAFUTAGA FAAFOUINA FAIFEAU & A'OA'O TAUSINUU
2025

TESALONIA: Naunautaiaga mo le Talalelei ia Keriso
THESSALONICA: Yearning for the Gospel of Christ

Alesana F Pala'amo FS
19 Aokuso, 2025

E muamua ona faatalofa atu i le paia o lenei mafutaga, i lau Susuga i le Taitai lau Susuga i le Toeaina, le Aufaigaluega Paia a le Atua Susuga i Toeaina, Susuga i Faafeagaiga ua mafai ona tatou potopoto faatasi i le laumua iinei i Malua; malo le soifua manuia, malo le lagi e mama. Viia le Atua ona o lona alofa ua taitaiina mai ai lo outou soifua ma so matou ola, mo le Mafutaga fa'afouina mo lenei tausaga. Malo le onosai, malo le faapalepale, viia le Atua ona o lona alofa e lē mavae lea ma i tatou uma.

FA'ATOMUAGA

O lenei pepa o loo faavae i se tasi fonotaga sa auai atu ai i Eleni i le tausaga nei, i le nuu o Tesalonia. O ni mafaufauga ma le to manatu agai le malaga faamisionare a le Aposetolo o Paulo, lea sa asia ai nuu e pei o Tesalonia, Perea (Berea), ma Filipi. O le faaiuga o Me tausaga nei, sa maua le avanoa ou te auai atu i le Fonotaga a le ICF International Congregational Fellowship, o se faalapotopotoga o ni Lotu Faapotopotoga (Congregational Churches) mai atunuu eseese o le lalolagi.

Malaga

E i ai le manatu ua silafia lelei e le paia o lenei Mafutaga le faamatalaina o se malaga. Aua foi o lea tatou te malaga i taimi uma. O malaga puupuu, o malaga e tau faaumiumi teisi, o malaga i luga o le vasa ma le sami loaloa, o malaga foi i le ea, faapea ma malaga i luga o le laueleele. O le tatou auai mai lenei tausaga mo lenei faatasiga, talitonu sa tapena mai lava le malaga a le sui auai lava ia. E le gata ona eseese tapenaga a le tagata mo se malaga, ae eseese foi ituaiga malaga, faapea le taunuuga o le malaga. O le malaga faamisionare a Paulo, e pei ona faatauaina ma talanoa agai i ai lenei pepa, o se malaga sa tele ona luitau ma faigata, na o'o lava ina faa-falepuipui ai Paulo ma Sila, i le malaga faamisionare lona lua. Sa la asia ai nuu nei o Lukaonia, Ferukia, Kalatia, Musia, Maketonia, Akaia, ona toe foi lea i Ierusalema le malaga lea. A'o le nuu o Tesalonia, e lei faigofie ona faa-talitonu tagata o lea nuu, i le Talalelei ia Keriso.


Tesalonia ma Perea (Bereoa)

Ua sili ona amio lelei o i latou nei i tagata Tesalonia; aua ua latou talia le upu ma le fiafia tele, ua saili i Tusi i lea aso ma lea aso, pe moni ia mea. (Galuega 17:11)

These Jews were more receptive than those in Thessalonica, for they welcomed the message very eagerly and examined the scriptures every day to see whether these things were so. (Acts 17:11)

O loo taua mai le vaega o le tusi o Galuega mataupu e 17, nuu nei e lua o Tesalonia ma Perea (Beroea). O Tesalonia sa toatele ai tagata Iutaia. Sa i ai foi le sunako mo ia tagata, aua latou tapuaiga faapea le faitauina, ma le a'otaulotoina o le tulafono (torah). Manatu loa le Aposetolo o Paulo, tasi lea auala e mafai ona talai ai le Talalelei ia Keriso, o ni ana lauga i le sunako. Peita'i e le'i talia gofie e tagata Tesalonia. Toatele o latou sa faalogologo, sa teena aoaoga a Iesu e pei ona laugaina e Paulo. Ae ina ua faaauau pea le galuega talai a Paulo i le sunako, ma foliga mai pei ua tauanau (persuade) tagata Tesalonia agai le Talalelei ia Keriso, o lea na i ai lava nisi sa latou taliaina aoaoga ia Iesu. O le faigata mo tagata Tesalonia, ona o le feau e pei ona folafolaina e Paulo, o le Talalelei mo tagata uma—tagata Iutaia, faapea ma tagata Eleni. E le'i faigofie mo nisi o le au Iutaia, i Tesalonia, ona latou taliaina lea ituaiga mafaufauga. Mo latou sa taliaina le Talalelei ia Keriso, e aafia ai se tasi o le aiga o Paulo, o Iasona (Jason). Ae ina ua vevesi le nuu ma lamatia ai le soifua o le Aposetolo o Paulo ma latou uma ua latou talia Iesu e pei o Iasona, lea na vavae ese mai latou i le po, ma agai i Perea. E ui e tau mamao lea nuu ma Tesalonia (80km), ae saili lava ma agai i ai, mo le saogalemu o latou ua taliaina aoaoga a Iesu.

E tuufaafeagai Tesalonia, ma le nuu o Perea.¹ E toatele foi tagata Iutaia sa i ai i lea nuu. A o lona eseese, na talia lelei e tagata Perea talaiga ia Iesu, e pei ona folafolaina e le Aposetolo o Paulo. O latou i lea nuu, sa tuuavanoa mo ni aoaoga fou, aemaise lava talaiga uma agai ia Iesu. Sa faatino foi le galuega talai a Paulo i le sunako mo tagata Iutaia, faapea ma le faalogo i ai o tagata Eleni. A o lona eseese tele, ua faigofie atu ona latou taliaina le Talalelei a Keriso mo tagata uma, i loo tagata Tesalonia. Na faapena foi ona talia ma le faafetai e Paulo ma Sila le talimalo o tagata Perea, faapea lo latou agalelei faaalua mo laua.



Sunako i Perea (Beroea, modern day Vereia), faatasi ma se faatagata o le Aposetolo o Paulo


¹ ICF International Congregational Fellowship Theological Commission, *Biblical and Theological Notes accompanying visits*, ICF Conference, Thessaloniki, Greece, 2025.

Filipi ma le papatisoga o Litia

O le tasi lenei o nuu sa matou asia i le fono sa auai atu i ai. O Filipi foi, o se tasi o kolone o le malo Roma, e pei maua nisi o faitau i le tusi o Galuega.² O le nuu foi lenei o loo taua i le 1 Tesalonia 2:2, sa latou agaleaga i le Aposetolo ma lana aumalaga. O Filipi foi lea sa papatisoina ai Litia, i fafo ane o le pa o le aai. E pei ona maua mai le tusi o Galuega 16:14, o Litia o se tina sa ia talitonuina le Talalelei ia Keriso, ma faapena ona papatisoina ai o ia, mo lona aiga.

Sa laugaina e Paulo aoaoga ia Iesu, i le vaitafe e fafo mai o pa o le aai, sa faapotopoto ai nisi e fia faalogologo. Sa i ai ma Litia, o se tina faatau ie pauli, o se tasi ua atoa lona faatuatua i le Atua. E i ai le talitonuga o Litia o le tagata muamua lea sa papatisoina, i laueleele o Europa. O le faatuatua o lenei Tina ma le matala o lona loto ina ia oo ia te ia le Agaga o le Atua, lea na manuia ai o ia faatasi ma lona aiga.³

O le taimi nei ua le o toe i ai le nuu o Filipi e pei ona sa i ai i le uluai seneturi (TA), ae o loo i ai toega o le nuu (remains). E ese foi lagona sa oo mai, ina ua matou savavali i nofoaga sa laugaina e le Aposetolo o Paulo, i le taumafai e talai le Talalelei ia Keriso. Aemaise lagona ina ua vaai ma molimauina, vaega o le aai o Filipi sa sasaina ma agaleaga ai puleaga a le malo Roma, ma oo ai lava ina ua faafalepuipui o laua ma Sila. O lagona o le faatauvaa, talu nei toa o le Talalelei, o lea lava na oo ai le talaiga ia Keriso i le atu Europa, ma Lonatona, ma agai mai loa i Samoa e pei ona faatalalelei ai i tatou. A o le loto maulalo, tatou te lagona ai, e pei ona oo mai i lea aso, o lea tatou te faaaauu lava le talaiga o le tatou Alii Faaola, e pei ona i ai le galuega ua valaauina ai i tatou.



O le fale puipui i Filipi, sa i ai Paulo ma Sila

[faamolemole silasila ane i le ata puupuu (video) ua tapenaina]

² As Matthew Skinner has noted, Paul has visited Roman colonies like Pisidian Antioch and Lystra, but there has not been such an explicit focus on their colonial status (Matthew L. Skinner, *Acts: Interpretation Bible Commentary*, Westminster John Knox Press, 2025, pp. 219-220).

³ William H. Willimon. *Acts (Interpretation)*. John Knox Press, 1988, p. 136.

Faatatau o lenei pepa

O se faamanatu a lenei pepa mo le paia o lenei Mafutaga, e talitonu o loo naunau mai pea le toatele o tatou tagata, i le Talalelei ia Keriso. O se itu lelei lea mo le galuega, o le naunau mai o tagata. Ae afai ua tau faatelegese, pe tau faaitiitia le naunau mai o tagata mo le talalelei ia Keriso, atonu e ono fesoasoani i ai se vaega o lenei pepa, i le matou faatinoga sa faia i le vaitafe sa papatisoina ai le Tina ia Litia, i Filipi. I le ava tele, tatala o tatou seevae (se'i tulou), ma faalogoina le malulu o le vaitafe, ina ia tatou tau iloa ai ni mafuaaga tataua ala ai ona le toe naunau mai nisi i le Talalelei ia Keriso. Ona fai lea agai i ai se fuafuaga. Se faaitaitaiga, afai o tupulaga talavou ua tau faaitiitia lo latou naunau mai i le Talalelei ia Keriso, i se tatou galuega o loo faia mo le Atua, atonu e mafai ona tapu'eina fanau ia o le Ekalesia, pe a tatou iloa ma faalogoina, faigata ma lu'itau o loo feagai ma latou. Ona fai lea o se suiga tataua, ma talafeagai, e malilie uma ai tagata, ina ia naunau mai pea i le Talalelei ia Keriso. E faapena foi vaega eseese i lo tatou Ekalesia.

I le ma lenei, ia tatou faalagolago i le Agaga o le Atua e fesoasoani mai i le tele o luitau e tulai mai i le galuega ua valaauina ai lenei mamalu, ma tatou uma. O le avanoa sa maua i le fono i Tesalonia, sa molimauina ai le faigata o le malaga faamisionare sa feagai ma Paulo i lea foi atunuu. A o le faalagolago a le Aposetolo o Paulo i le Agaga o le Atua, na manuia ai lana malaga faamisionare, ma faaosofia ai le toatele, ina ia naunau i le Talalelei ia Keriso. E manuia ai foi o a tatou malaga faaleagaga, i tausaga uma, i le faatasi mai o le Atua ua valaauina i tatou.

UPU FA'AI'U

E leai se manatu o lenei pepa, o loo i ai se atoatoa mo le mataupu e pei ona sa taumafai i ai. A o le faamoemoe lava ia, atonu o lo'o maua atu ni faatupu manatu mo le mamalu o lenei Mafutaga lenei tausaga. E pei ona faailoa atu, o lenei pepa o se tuufaatasiga o ni mafaufauga ma faatupu manatu, e ala i le fonotaga sa auai ai i Tesalonia i Eleni. O le faafetai i le Ekalesia, i Tama o le Ekalesia, le Komiti o Malua, le alii Pule ma le Kolisi i Malua, ona o lenei avanoa ua ou maua matou te faasao i le Tusi Paia ma le Mataupu Silisili, ma isi uso a Kerisiano, ma molimauina ai foi nisi o nofoaga taua o le uluai Ekalesia Kerisiano. O lea ua faasoa atu nisi o manatu ma mafaufauga, ina ia fesoasoani i galuega ua valaauina ai e le Atua lenei mamalu. Viia le Atua ona o lona alofa, ma lona agalelei, ma mea uma ua ia faia, mo tatou uma!

Ia manuia tele le Mafutaga lenei tausaga.
Fa'afetai.

Alesana F Pala'amo FS
Faiva Alofilima Mataupu Silisili—*Practical Theology*